



Rabu, 15 September 2021
Ogen: Perb. Rasul 17: 19-21



Turiken Pengajarenndu



Bangsanta Indonesia eme Bangsa si menganut paham demokrasi. Labo gundari ngenca tapi nai-nai nari. Bahkan sada si la i bas Pancasila e me *Kerakyatan yang dipimpin oleh hikmat kebijaksanaan dalam permusyawaratan perwakilan*. Enda me buktina maka bangsanta Indonesia ngergaken pendapat-pendapat kalak sideban, janah i bas muat keputusan labo lit sifat memaksaken kehendak pribadi/sesekalak jelma. Gerejanta GBKP sistemna runggu. Payo lit dogma/ ajaren dengen lit pe aturen. Tapi mehuli kal kai pe si ateta si bahan isosialisaken lebe, ituriken lebe emaka kenca ipahami ipindo me kai pendapat-pendapat peserta runggu e (umpamana Sidang Majelis Runggun). Kerina pendapat ibegiken, labo lit si mis itebeng. Emaka kenca ibegiken kerina, isuratken kerina seh me ku bas muat keputusan si sentudu ras aturen-aturen Gerejanta.

I bas oratenta, asum Paulus seh i Aten, iidahna me patung sesembahen kalak Aten e dengen inganna mereken persebahen man dibata si la itandai. Emaka rutang kal i bas pusuh Paulus guna nuriken dengen mpetandaken Tuhan Jesus Kristus e me Dibata si itandaina. Puji Tuhan, asum si e kerina kalak Aten e terbuka dengen ibereken kesempatan man bana guna nuriken pengajarena i bas sidang Aeropagus. Sabap kalak Aten nggit kal engkeriken wari-warina guna nuriken ras megi-megi kerna kai-kai si mbaru.

Uga i tengah-tengah jabunta moria? Ma labo kita nande si otoriter ari? Kita pe nuriken pengajaren man anak-anakta, sue kata Dibata, sue ras pengarapenta guna kiniulin geluh anak-anakta. Tapi, ranan anak-anakta pe perlu ka sibegiken, siberekenlah kesempatan man bana guna nuriken kai si lit i bas ukurna, kai si mehuli iakapna, kai pengalamenna seh maka igejapna meherga kap ia i bas keluarga.